

*Regional News Unit AIR Aizawl*  
*Wednesday, August 14, 2024*

Time - 7:30 -7:40Hrs

**REGIONAL NEWS BULLETIN**

**HEADLINES (MORNING)**

- Chief Minister Pu Lalduhoman Sawhthing lei leh hralh chungchangah Grade A leh B a awm lo ang a ti.
- Mizorama khaw 263 ah Sawhthing a tam a, chungkaw 6586 a nghawng mek.
- Calcutta High Court chuan Kolkatta-a medical college and hospital zirlai pawngsual leh thah chungchangah CBI chhui turin a ti.
- Philipines-a Dengue hrileng avnagin mi 364 an thi tawh.

<><><>

CM

Chief Minister Pu Lalduhoman Sawhthing lei leh hralh chungchangah Grade A leh B a awm lo ang a ti.

ZPM General Headquarters a General Secretary ten Chief Minister hi a Office ah hmuin, sawhthing Grade A leh B siam tumna chungchang an sawipuaia, Pu Lalduhoma chuan, ruahmanna hmasa ah chuan sawhthing lei leh hralh chungchangah Grade A leh B siam tumna a awm a, hei hi an sumdawnpuite nen thawhhona tha leh tlo an neih theih nana ruahmanna a ni a, amaherawh chu mipui lamin Sorkar ruahmanna hi an hriatthiam chiah loh avang leh kuthnathawktute rilru a hnual ang tih hlauin he ruahmana hi mipui hriatthiam zawnga her rem a ni a, Grade A leh B a awm dawn lo a ni, a ti.

Hetih lai hian sawhthing chingtuten an hralh dawn hunah an sawhthing chu a fai tha hle tur a ni a, rilru pamham pu leh hlawk tum lutukna avanga insumdawn tawn nana him lo thil lo ti an awm a nih chuan, a hralhna kawnga harsatna an tawk a nih pawhin sorkawin mawh a phur dawn lo a ni, a ti a, Chief Minister chuan, “Thlai thar lei hi Sawrkar Flagship pawimawh ber a ni a, inthlan hma atanga mipui hnena an lo aupui tawh a ni a, kuthnathawhtute khaichhuahna tura hmalakna pawimawh tak a ni a ti.

Pu Lalduhoma chuan mipui an ti beidawng thiang lo tih sawiin an ruahmanna a hlawhtlin theih nan helama mawhphurtu ten ngawrh takin hna an thawk mek a ni a ti a. Tlaithar lei leh hralh chungchangah hian hnam dangten Mizote chu hnam rinawm leh sumdawnpui tlakah min ngaise an duh a, tunhma thil avanga mipui rilru puthmang lo kal diktawhlote pawh siamthat beisei a ni, a ti.

<><><>

## OPERATION GINGER

Mizorama khaw 263 ah Sawhthing a tam a, Horticulture Dept chhinchhiah danin heng khaw 250 chuanga sawhthing chingtu chungkaw 6586 te Sawhthing a tam tan tawh a ni.

Sawhthing tam chungchang hriat a nih avang hian Horticulture Department chuan hma la nghalin nimin khan Horticulture dept a Officer leh Field Staff ten Sawhthing tam leh natna ven dan leh enkawl dan an zir a, Training of Trainers on Operation Ginger - Management of Pest and Diseases on Ginger hi Horticulture Conference Hall ah an buatsaih a ni a, Training hi Horticulture Director Pu C.H. Lalmuanpuia chuan a kaihruai a, Dr. H. Vanlaldiki, Dy. Director in zirtirna pe in Mizoram pum atangin thawktu an kal a ni.

Horticulture Dept chuan kumin ah Zoram pumah Sawhthing ching an tam thu an sawi a, Sawhthing a tam tan avang hian Horticulture dept chuan mipui tam zawkte zirtir nan cable tv a chhuah turin Horticulture mi thiam ten a hmunah an kal chilh a ni.

Training hi Zoram puma Horticulture hnuaiia thawk ten ko kim zawka inzirtirna an neih theih nan buatsaih a ni a, tunkar ni 16 hian Horticulture Minister Prof Lalnilawma chuan Sawhthing tam beihpui thlakna ‘Operation Ginger - Fehchhuah Runpui’ chu Horticulture Office atangin a vai liam dawn a, horticulture a thawkten district tin tuamin an fehchhuak thin dawn a ni.



## TRIBAL POLICY

Women & Child Development Department hnuaiia State Tribal Resource & Training Centre (STRTC) buatsaihin State Tribal Welfare & Development Policy chungchang inhrilhhriatna leh inrawnkhawmna hun nimin khan Aijal Club-ah neih a ni a. He hun hi Social Welfare & Tribal Affairs Minister, an Chairperson Pi Lalrinpuin a hmanpui a ni.

Pi Lalrinpuin chuan ruahman lawk anga a vawikhat nan leh Mizote tana bung thar ni tura Mizoram bik tana Tribal Policy hmawr baw fel a ni tur chu lawmawm a tih thu sawiin, hei hian State Tribal Resource & Training Centre tana hmalakna turah hmasawmna duhawm tak a thlen ngei a beisei thu a sawi a. Tribal-te hamthatna leh hmasawmna kawng dap kawnga inhrilhhriatna leh inrawnkhawmna buatsaih chu ram hmasawmna leh Department hmalakna atan a tangkai dawn tih a sawi baw.

He hunah hian State Tribal Resource & Training Centre-in State Tribal Policy an lo duan chhin leh mithiam engengemawzat tena an lo buaipui tawh khaikhawmna tlangpui chu STRTC Director Dr. Lalhriatzuali Ralte chuan India rama Tribal-te hmasawmna kalpui a nih dante tarlangin, Sorkar laipuiin India ram danpui hmangin policy leh guideline chi hrang hrang siam tawh mah se, mumal leh awmze nei zawka Mizoram hmathlir 2047 ruahmanna neih a tul avangin State Tribal Policy hranpa nei tura hmalak chhoh a ni, a ti a. He policy leh Sorkar laipui hmalakna ‘Support to TRI’ tih scheme hnuaia nasa taka hmalak a nih tawh dante leh State Tribal Resource & Training Centre thuam chak mek a nih dante a tarlang bawk.



#### MALARIA IN MIZORAM

Kumin January atanga July thla inkarah Malaria vei mi 12290 awmin heng zingah hian mi 5 in nunna an chan.

Health and Family Welfare thuchhuah tarlan danin kumin chhunga Malaria vei mi 12290 zingah hian Malaria PF mi 6349 an awm an, nunna chan mi 5 awmin nunna chan zawng zawng hi Lawngtlai District mi leh sa vek an ni.

Nimin khan H&FW Department hnuaia National Vector Borne Disease Control Programme (NVBDCP) chuan DHME Auditorium, MINECO-ah State Review Meeting an nei a,

Meeting-ah hian Kumin Jan – July chhunga natna hrang hrang Malaria, Dengue leh Chikungunya a Mizoram dinhmun te thlir let a ni a. Kumin chhung hian kumdang zawng aiin Malaria PV a pung ni a report niin kumin hian Dengue vei hmuh chhuah tawh zat hi mi 267 niin, Chikungunya vei hmuhchhuah tawh zat hi mi 3 niin report a ni bawk.

Mizoramah hian District 4 heng, Lawngtlai, Lunglei, Mamit leh Siaha District-te hi Malaria tam zual biknate an ni a, a bikin International Border – Bangladesh leh Myanmar ramri hrulahte Malaria hi a tam zual ni a report a ni.

H&FW Principal Director Dr Vanlalsawma chuan natna laka invenna kawnga sawrkar hmalakna hrang hrangte tha taka kalpui mek a nih thu a sawi a, hmun thenkhata thawktu indaih lohnate pawh siam rem zel a nih thu sawiin, Malaria tamna hmuna thawktu te pawh theih tawp chhuaha thawk sauh sauh turin a fuih a ni.

NVBDCP hnuaiah hian Malaria natna laka invenna thosilen damdawia chiah sa sem te, thosilen pangngai damdawia chiah sakte leh chenna in chhung thosi hlo a kahte kalpui mek a ni.



## CHAMPHAI

Champhai Keilungliah tuikhuah enkawl kawnga hmalatute remruatna angin Keilungliah tuikhuahah nimin khan Sangha no chhuah a ni a. Committee Chairman Champhai Bawrsap Pu VL. Remliana hoin he hun hi hmanpui a ni.

He hunah hian sangha chi hnih - Indian Major Carp leh Exotic Carp note singkua leh sang ruk (96,000) chhuah a ni a. Sangha no te hi District Fisheries Development Office ten an rawn tum a ni.

Sangha chhuahna hunah hian Keilungliah Management Committee member - PHE Department, DFDO, I&PR, MJA leh tlawmngai pawl hruaitute an tel a ni.

<><><>

## KHAWZAWL

Khawzawl Deputy Commissioner, Pu K. Vanlalthiana chuan Organic Certified FPC ni mek, Tuichangral Organic Farmer Producer Company te thar chhuah Lakhuihthei Quintal 10 chu Mumbai lama hralh turin nimin khan a vai liam.

He lakhuihthei hi tun thla ni 17-18-a “Mizoram Pineapple Festival” Horticulture Dept. Mizoram te sponsor na hnuai a, Josie’s Kitchen, North East Cuisines, Mumbai te buatsaihna hmun a zawrh chhuah tur a ni.

He organic lakhuihthei hi (Mission Organic Value Chain Development for North Eastern Region scheme hnuai farmer in register te ta niin, Mission Organic Mizoram (MOM) - State Lead Agency leh Clover Organic Pvt. Ltd.- Service Provider te enkawl lai an ni.

“Tuichangral Organic FPC” te hian an Lakhuihthei thar chhuah te hi Haryana, Mumbai leh Dehradun lamah lo thawn chhuak tawhin, kuthnathawktute tan phurna leh chona nasa tak a pe tih an sawi a ni.

<><><>

## DOCTOR CASE

Calcutta High Court chuan Kolkatta-a medical college and hospital zirlai pawngsual leh thah chungchangah CBI chhui turin a ti. Court chuan CBI hnena document kimchang hlan turin Police a hriattir bawk a. Chief Justice T.S. Sivagnanam leh Justice Hiranmoy Bhattacharya awmna bench chuan he thupek hi nimin khan chhuahin vanduin tuartu chhungte hnen atanga ngenna a ngaihtuah hnuah hnuah thutlukna hi a siam a.

Hetihlai hian Kolkatta-a doctor training lai pawngsual leh thah anih avang hian rampumah doctor ten lungawilohna an lan tir chu Union Health Minister JP Nadda’n an ngenna te tihhlawhtlin a tiam avangin nimin khan an nawrhna an ti tawp. Puan tawh angin Federation of Resident Docotors Association (FORDA) huaihawtin ramchhunga hospital doctorte an nuar a.

Maharastra-ah chuan emergency duty tihloh chu an nuar vek a. Medical college-a senior medical teacher, lecturer te leh zirchhuakte ten heng damdawiin te hi an enkawl mek a. Maharastra State Association of Resident Doctors (MARD) chuan nimin khan thuchhuah siamin RG Kar Medical College, Kolkatta-a nuarte chu an thlawp thu an sawi a ni.

Jharkhand ah pawh Rajendra Institute of Medical Sciences (RIMS) ah chuan junior doctor te tiamchin awm loin an nuar a. He pawikhawihna hi CBI chhui ngei an phut tih anlo sawi tawh a ni.

<><><>

## PHILIPINES

Philipines-a Dengue hrileng avnagin mi 364 an thi tawh. Tun dinhmunah Philipines ah hian Dengue hri kai hi mi nuai 1 sing 3 sang 6 leh 161 an tling tawh a. Department of Health Assistant Secretary Albert Domingo chuan mipuite chu dengue hrileng laka fimkhur turin a chah a. Hetiang tui atanga hri darh natna hrik te hi fur ruahtui tlak lai July atanga October thla chung hian a leng nasa thin a ti.

<><><>